

---

OFFERYNNAU STATUDOL  
CYMRU

---

**2020 Rhif 1451 (Cy. 313)**

**Y GWASANAETH IECHYD  
GWLADOL, CYMRU**

**Gorchymyn Iechyd a Gofal Digidol  
Cymru (Sefydlu ac Aelodaeth) 2020**

**NODYN ESBONIADOL**

*(Nid yw'r nodyn hwn yn rhan o'r Gorchymyn)*

Mae'r Gorchymyn hwn wedi ei wneud o dan adran 22 o Ddeddf y Gwasanaeth Iechyd Gwladol (Cymru) 2006 ("y Ddeddf"). Mae'n sefydlu Awdurdod Iechyd Arbennig newydd, sef Iechyd a Gofal Digidol Cymru ("IGDC"), ac yn gwneud darpariaeth ynghylch ei swyddogaethau a'i aelodaeth.

Mae erthygl 3 yn nodi natur swyddogaethau IGDC sydd i'w pennu'n fwy penodol mewn cyfarwyddydau a roddir gan Weinidogion Cymru o dan adran 24 o'r Ddeddf. Bydd swyddogaethau IGDC yn ymwneud â darparu platfformau, systemau a gwasanaethau digidol a chefnogi gwella systemau o'r fath ac unrhyw swyddogaethau eraill a gyfarwyddir gan Weinidogion Cymru er mwyn sicrhau y darperir neu yr hybir gwasanaethau o dan y Ddeddf.

Mae erthygl 4 yn nodi aelodaeth IGDC ac mae erthygl 5 yn darparu bod Deddf Cyrff Cyhoeddus (Derbyn i Gyfarfodydd) 1960 yn gymwys i gyfarfodydd IGDC.

Nid yw'r Gorchymyn hwn yn gwneud unrhyw ddarpariaeth sy'n ymwneud â throsglwyddo swyddogion, eiddo neu atebolrwyddau.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Gorchymyn hwn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Gorchymyn hwn. Gellir cael copi oddi wrth: Yr Adran Iechyd a Gwasanaethau Cymdeithasol, Llywodraeth Cymru, Parc Cathays, Caerdydd, CF10 3NQ.

---

OFFERYNNAU STATUDOL  
CYMRU

---

**2020 Rhif 1451 (Cy. 313)**

**Y GWASANAETH IECHYD  
GWLADOL, CYMRU**

**Gorchymyn Iechyd a Gofal Digidol  
Cymru (Sefydlu ac Aelodaeth) 2020**

<i>Gwnaed</i>		<i>7 Rhagfyr 2020</i>
<i>Gosodwyd Cymru</i>	<i>gerbron</i>	<i>Senedd 9 Rhagfyr 2020</i>
<i>Yn dod i rym</i>		<i>30 Rhagfyr 2020</i>

Mae Gweinidogion Cymru yn gwneud y Gorchymyn a ganlyn drwy arfer y pwerau a roddir gan adran 22(1), (2), 4(a) ac (c) o Ddeddf y Gwasanaeth Iechyd Gwladol (Cymru) 2006(1).

**Enwi, cychwyn a dehongli**

1.—(1) Enw'r Gorchymyn hwn yw Gorchymyn Iechyd a Gofal Digidol Cymru (Sefydlu ac Aelodaeth) 2020.

(2) Daw'r Gorchymyn hwn i rym ar 30 Rhagfyr 2020.

(3) Yn y Gorchymyn hwn—

ystyr “data gwasanaethau iechyd” (“*health service data*”) yw data a brosesir ar gyfer darparu neu hybu gwasanaethau o dan y Ddeddf neu mewn cysylltiad â darparu neu hybu gwasanaethau o'r fath;

ystyr “y Ddeddf” (“*the Act*”) yw Deddf y Gwasanaeth Iechyd Gwladol (Cymru) 2006;

ystyr “fferyllydd cofrestredig” (“*registered pharmacist*”) yw person sydd wedi ei gofrestru'n fferyllydd yn Rhan 1 neu 4 o'r gofrestr a gynhelir o dan erthygl 19 o Orchymyn Fferylliaeth 2010(2);

---

(1) 2006 p. 42. (“Deddf 2006”).  
(2) O.S. 2010/231.

ystyr “IGDC” (“*DHCW*”) yw Iechyd a Gofal Digidol Cymru;

ystyr “nyrs gofrestredig” (“*registered nurse*”) yw nyrs, bydwaig neu gydymaith nyrsio sydd wedi ei chofrestru neu ei gofrestru yn y gofrestr a gynhelir o dan erthygl 5 o Orchymyn Nyrsio a Bydwreigiaeth 2001(1) yn rhinwedd cymhwyster sy’n gymhwyster a gymeradwyir at ddibenion cofrestru yn y rhan berthnasol o’r gofrestr;

ystyr “optometrydd” (“*optometrist*”) yw person sydd wedi ei gofrestru yn y gofrestr optometryddion a gynhelir o dan adran 7 o Ddeddf Optegwyr 1989(2);

ystyr “platfformau, systemau a gwasanaethau digidol” (“*digital platforms, systems and services*”) yw caledwedd, meddalwedd a threfniadau eraill ar gyfer casglu, storio, prosesu, dadansoddi, defnyddio a lledaenu data gwasanaethau iechyd yn ddigidol;

ystyr “proffesiynolyn gofal iechyd cofrestredig” (“*registered healthcare professional*”) yw person sydd wedi ei gofrestru ar y gofrestr a gynhelir gan y Cyngor Proffesiynau Iechyd a Gofal yn unol ag erthygl 5 o Orchymyn Proffesiynau Iechyd a Gwaith Cymdeithasol 2001(3);

ystyr “swyddog clinigol” (“*clinical officer*”) yw swyddog sy’n broffesiynolyn gofal iechyd cofrestredig; ymarferydd meddygol cofrestredig; nyrs gofrestredig; fferyllydd cofrestredig; ymarferydd deintyddol; neu optometrydd;

ystyr “ymarferydd deintyddol” (“*dental practitioner*”) yw person sydd wedi ei gofrestru o dan Ddeddf Deintyddion 1984(4);

ystyr “ymarferydd meddygol cofrestredig” (“*registered medical practitioner*”) yw person sydd wedi ei gofrestru’n llawn o fewn yr ystyr a roddir i “fully registered person” yn Neddf Feddygol 1983(5) sy’n dal trwydded i ymarfer o dan y Ddeddf honno.

## Sefydlu IGDC

2. Mae Awdurdod Iechyd Arbennig o’r enw Iechyd a Gofal Digidol Cymru neu Digital Health and Care Wales wedi ei sefydlu.

---

(1) O.S. 2002/253.  
(2) 1989 p. 44.  
(3) O.S. 2002/254 a ddiwygiwyd gan O.S. 2009/1182.  
(4) 1984 p. 24.  
(5) 1983 p. 54.

### Swyddogaethau IGDC

3. Mae IGDC i arfer unrhyw swyddogaethau a gyfarwyddir gan Weinidogion Cymru(1) mewn cysylltiad â—

- (a) darparu, dylunio, rheoli, datblygu a chyflenwi platfformau, systemau a gwasanaethau digidol;
- (b) casglu, dadansoddi, defnyddio a lledaenu data gwasanaethau iechyd;
- (c) darparu cyngor a chanllawiau i Weinidogion Cymru ynghylch gwella platfformau, systemau a gwasanaethau digidol;
- (d) cefnogi cyrff a phersonau a nodir mewn cyfarwyddydau a roddir gan Weinidogion Cymru i IGDC mewn perthynas â materion sy'n berthnasol i blatfformau, systemau a gwasanaethau digidol;
- (e) unrhyw fater arall er mwyn sicrhau y darperir neu yr hybir gwasanaethau o dan y Ddeddf.

### Aelodaeth IGDC

4.—(1) Aelodaeth IGDC yw—

- (a) cadeirydd;
- (b) is-gadeirydd;
- (c) dim mwy na 5 aelod nad ydynt yn swyddogion IGDC yn ychwanegol at y cadeirydd a'r is-gadeirydd;
- (d) dim mwy na 5 aelod sy'n swyddogion IGDC y mae rhaid iddynt gynnwys;
  - (i) prif swyddog;
  - (ii) swyddog cyllid;
  - (iii) swyddog clinigol;
- (e) dim mwy na 3 aelod cyswllt nad ydynt yn gynnwys i bleidleisio mewn unrhyw drafodion gan IGDC ac nad ydynt wedi eu cynnwys at ddibenion y cyfrifiad ym mharagraff (2).

(2) Ni chaiff nifer yr aelodau sy'n swyddogion IGDC fod yn fwy na nifer yr aelodau nad ydynt yn swyddogion o'r fath.

(3) Mae aelodau IGDC y cyfeirir atynt yn erthygl 4(1)(a),(b) ac (c) i'w hadnabod fel yr aelodau nad ydynt yn swyddogion.

(4) Mae aelodau IGDC y cyfeirir atynt yn erthygl 4(1)(d) i'w hadnabod fel y swyddog-aelodau.

(5) Mae aelodau IGDC y cyfeirir atynt yn erthygl 4(1)(e) i'w hadnabod fel yr aelodau cyswllt.

---

(1) *Gweler* adran 24 o Ddeddf 2006.

## Cyfarfodydd cyhoeddus

5. Mae Deddf Cyrff Cyhoeddus (Derbyn i Gyfarfodydd) 1960(1) i fod yn gymwys i IGDC.

*Vaughan Gething*

Y Gweinidog Iechyd a Gwasanaethau Cymdeithasol,  
un o Weinidogion Cymru  
7 Rhagfyr 2020

---

(1) 1960 p. 67; gweler paragraff 1(g) o'r Atodlen i Ddeddf Cyrff Cyhoeddus (Derbyn i Gyfarfodydd) 1960, a fewnosodwyd gan baragraff 91 o Atodlen 1 i Ddeddf Awdurdodau Iechyd 1995 (p. 17).